



Forum

Cuntegn

- 1 Editorial
- 2 Revista 2023
- 3 FAUSTA pioniera
Rapport final
Voluntaris
Retrospectiva fotografica
- 4 Tradiziun religiusa
Las treis orglas dalla
baselgia da Danis
Da sgaras e tarlecs
Il Gioder,
il zenn grond da Breil
- 5 600 onns Ligia Grischa

Editur

Forum cultural Breil
www.focubreil.ch
Ediziun: 650 Exemplars

Preziadas commemoras
Preziai commembers

Amiez quella gasetta anfleis
vus in cedel da pagament.
Cordiamein engraziein nus
per vies generus sutegn
entochen dacheu e sperein
che vus sustenîes era egl
avegnir nossa cultura cun
la mudesta contribuziun
annuala da 30 francs.

Grond engraziament!

Editorial

En connex culs problems, cun ils quals la cultura tradiziunala ha da sbatter ozildi, han ins saviu leger en ina gasetta austriaca il suandont.

Munconza d'empatia

Il schazegiar, tgirar e sviluppar nossa ierta, nossa atgnadad, quei savein mo nus. Quei savein nus ni copiar ni comprar. Il manco d'empatia enviers las uniuns e lur tradiziuns ha naturalmein era da far cun nies patertgar egoistic, cun nies individualissem.

Maletg romantic dallas regions periferas

Magari aud'ins ch'il turissem rumpi viaden ellas regions periferas e seigi l'empudientscha dalla digren culturala dallas cuminonzas tradiziunalas. Mo gliez ei mo la mesa verdad. Pli savens ha quella digren da far cul svilup „modern“ da nossa societad, ni forse meglier detg culla unificaziun da nossa societad.

Differenziaziun denter fuorma e funcziun dalla cultura

La fuorma dad in element cultural ei ina caussa, la funcziun dad in tal element ei denton pli impurtonta. Magari vul ins buca veser che la funcziun d'in element cultural ei semidada el decuors dil temps. Ins negligescha il svilup e resca cheutras che beinenqual usit e tradiziun svaneschan cul temps.

Relaziun historica

Il svilup e la midada ein pia impurtonts elements pil manteniment dalla cultura. Per promover la cultura a moda autentica, eis ei denton fetg impurtont da buca piarder la relaziun cullas ragischs historicas.

Lavur dil Forum cultural Breil

Gest ils puncts numnai cheu sura munta ina impurtonta part dalla lavur dall'uniun Forum cultural Breil.

Era sut il niev presidi da Maurus Cathomas vegn il forum cultural a sestentar per la cultura en nos vischinadis. Bugen sperein nus era d'astgar quintar cun vies sustegn egl avegnir.

Dapli sclariment dall'uniun anfleis vus sut focubreil.ch.

Michael Friberg

Revista 2023

Uniun Forum cultural

Intent

Tenor artechel 2 dils statuts ha l'uniun Forum cultural Breil gl'intent da tgarar, promover e sustener la cultura en ils vischinadis vegls dalla vischnaunca da Breil.

Commembers

Actualmein dumbra l'uniun ferm tschien commembers. Bien duas tiarzas da quels habiteschan els vischinadis numnai. Tier ina tiarza dils commembers setracta ei oravontut da convischinas e convischins ch'ei secasai egl jester. Lu essan nus era engrazieivels a tut las fatschentas ed als hosps da vacanzas che sustegnan l'uniun.

Activitads 2023

En LA QUOTIDIANA dils 27 da december 2023 han ins saviu leger sut il tetel general

Quei ei stau nies 2023

denter auter il suandont:

Fausta piuniera a Breil

Durant quater meins ei il vitg da Breil seregurdaus igl onn 2023 dalla Fausta Capaul che ha – cun siu restaurant ed albiert – iniziàu il

turissem da stad a Breil avon 150 onns. Ina fiasta d'avertura, in'exposiziun da maletgs digl artist Charles Flach, in teater el liber sco punct culminont ed in luvratori d'ideas cun il focus sil futur. Quei ein stai ils craps da cantun dil program da giubileum pil 150avel onn dapi las empremas activitads turisticas a Breil. In grond publicum d'indigens e da hosps da vacanzas ein separticipai allas occurrenzas dalla Fausta piuniera, oravontut al teater el liber denter ils 4 ed ils 16 d'uost 2023.

Pil Forum cultural han quellas festivitads era muntau il pensum impurtont digl onn. Il president ed il cassier dil forum ein stai engaschai el comité d'organisaziun e biars auters commembers dil forum ein stai engaschai ellas differentas festivitads sco voluntaris. Sin las proximas paginas vegn aunc inaga fatg menziun da quellas beingartegiadas occurrenzas ch'ei stadas d'impurtonza per vitg e vischnaunca.

Curtgin Crest La Crusch

En connex cun il giubileum da 150 onns turissem da stad, ha la vischnaunca decidu da restaurar il Curtgin Crest La Crusch. Cun quella caschun ha il Forum cultural ademplier in giavisch daditg exprimius, numnadamein da tschentar en curtgin ina tabla panoramica cun las indicaziuns dalla cuntrada ch'ei veseivla da quei punct anora.



Tabla panoramica Curtgin Crest La Crusch | Foto Vorcon Laax

Geologie und Landschaftsgeschichte der Surselva

Il Forum cultural Breil e “Schichtwechsel – La Surselva” han envidau ils 9 da fevrer 2023 ad ina sera da referat cul tetel “Geologia e historia dalla cuntrada dalla Surselva”. In numerus ed interessau auditori ha tedlau las explicaziuns dil referent Adrian Pfiffner.

Il geolog Adrian Pfiffner ha visitau la scola primara a Domat ed il gimnasi a Cuera. Il studi da geologia ha el terminau alla Scola federala politecnica a Turitg igl onn 1972. El ei staus engaschus sco professor per geologia en pliras universitads. In da ses temas specials ein las boas da Tumein e Flem stadas.

La Surselva ei reha da crappa. Granit fetg dir sebratta cun crappa da sediments pli loma. La pli veglia specia da crappa ha 500 milliuns onns, la pli giuvna 300 milliuns onns. La gruppaziun dils differents tips da crappa ei sedada entras la formaziun dallas alps.

Il referent ha capiu a moda oreifra dad entusiasmar il publicum per la geologia dallas alps, en special dalla Surselva. La sera ei vegnida terminada cun in apero, duron il qual igl ei vegniu discutau vivamein dalla Surselva e sia crappa speciala.

Archiv cultural

Per saver arcunar e registrar las biaras actas ch’il Forum cultural ha rimnau ils davos onns ha la vischnaunca mess a disposiziun ed endrizzau ina stanza en casa communal che duei survir per quei intent. La lavur per propi vid igl archiv cultural vegn entschatta igl onn 2024.

Sper las activitads numnadas, ei l’uniun era stada responsabla il 2023 per differentas activitads che serepetan mintg’onn puspei.

Rendaquen 2023

Quen da gudogn e sperdita

Entradas	9'000
Expensas	13'000
Sperdita	4'000

Bilanza

Facultad per 31.12.2022	20'000
Facultad per 31.12.2023	16'000
Sminuaziun dalla facultad	4'000

Quei ei ina cuorta resumaziun dallas activitads dall’uniun igl onn 2023.



Tgi enonuscha quei terment drag en l’Alp nova? | Foto Ciril Friberg

Retrospectiva FAUSTA piuniera 2023



Il comité d'organisaziun da diesch persunas cun Otmar Seiler sco president aveva mess la suandonta finamira:

Igl omagi ch'ei vegnius repartius sin gl'entir onn 2023 duei possibiltar in'avischinaziun alla persuna Fausta Capaul, a siu temps ed all'entschatta dil turissem a Breil. El duei denton era riscar in'egliada viers igl avegnir.

Cun las quater occurrenzas bilinguas (romontsch e tudestg) ei quei reussiu cumpleinamein:

avertura – ils 29-05-2023 en il Curtgin Crest la Crusch

L'inauguraziun dil liug commemorativ renovau daventa ina partenza fulminanta dalla FAUSTA piuniera. Il curtgin regorda alla realisaziun dall'emprema colligiazion carrabla da Breil sur Vuorz a Glion igl onn 1870. Quella via da colligiazion ha pér possibiltau la historia da success dall'ustria Fausta Capaul e sia ustiera ed ha lantschau il turissem a Breil.

La "Gasetta Forum" cumpara. In magazin, el qual ton la biografia dall'ustiera Fausta Capaul sco era la historia dalla Casa Fausta Capaul ein resumadas. Plinavon dattan plirAs auturAs in'egliada sin l'entschatta dil turissem.

vernissascha dall'exposiziun da maletgs Charles Flach - ils 16-07-2023 en la Casa Fausta Capaul

Per l'emprema ga vegnan ils purtrets dil hosp fideivel dalla Casa Fausta Capaul mussai a Breil en in'exposiziun completa. In grond diember da purtrets da Charles Flach portan tetels cun in connex direct cun Breil: Alte Weberin in Brigels, Brigels im Winterkleide, Alte Brigelserin im Sonntagskleide.

inscenaziun teatral-musicala – 4 tochen 13-08-2023 avon la Casa Fausta Capaul

La producziun sut tschiel aviert astga vegnir titulada sco success cumplein cun siat presentaziuns vendidas ora. Passa 1200 aspectaturAs applaudeschan cun entusiassem allas acturAs da l'Uniun dramatica Breil sut la direcziun dil duo artistic David Flepp ed Annadora Friberg.

finiziun – ils 16-09-2023 en ed avon la Casa Fausta Capaul

Rodund 30 persunas seradunan alla meisa rodonda per dar in sguard sil futur turistic da Breil e tschercar la FAUSTA piuniera da damaun. L'exposiziun sut tschiel aviert cun las numerusas ideas e visiuns, ch'ei vegnidas memorisadas sin measas rodondas, resta aviarta tochen viers la fin d'october.

Il comité d'organisaziun engrazia da tut cor a sponsurAs e fauturAs. Alla vischnaunca da Breil ed a Surselva tourissem s'auda in engraziament special per il sustegn finanziel e la fidonza. In sincer Dieus paghi pigl agid dils rodund 130 voluntaris e per la beinvuglientscha dil publicum.

Entras quellas forzas unidas ein tut las occurrenzas daventadas in success ed ellas han gidau da dumignar il preventiv da CHF 150'000.-.

Grazia alla FAUSTA piuniera ha Breil passentau ina stad magica ed astga ussa ir el futur cun in brav mantun ideas piunieras.

En num dil comité d'organisaziun FAUSTA piuniera

Otmar Seiler, president

Voluntaris

Per ch'ina festività da tala dimensiun funcziuni senza incaps, drova ei plunas personas ch'ei promtas da segidar ed era luvrar davos las culissas. Varga tschien personas han surpriu in pensum en connex cun las fesivitäts dalla FAUSTA piuniera. Bugen pren il comité d'organisaziun la caschun dad engraziar a tuttas e tuts ch'ei seschai engaschar pil beingartegiar da quellas festivitàs.

Comité d'organisaziun

Balett Helena	finanzas sponsurs hosps aperos
Cathomas Maurus	exposiziun Casa Fausta Capaul crotscha e cavagl
Cathomen Larissa	marketing layout
Cavegn Lea	voluntaris giugadura
Flepp David	menader artistic inscenaziun reschia
Friberg Annadora	menadra artistica inscenaziun costumes tribuna requisits
Friberg Michael	fatgs historics redacziun hosps
Gabriel Silvan	ticketing turissem hosps
Seiler Otmar	presidi moderatur hosps medias
Vincenz Werner	infrastructura traffic

Casa Fausta Capaul

exposiziun: Althaus Judith

ustiera ed ustiers: Schmed Roel, Seiler Marc, Vincenz Claudia, Vincenz Gianluca

Ticketing

Andreoli Cornelia, Cavegn Mauro, Gabriel Denise, Steger Martina, Tuor Patric

Inszenaziun teatral-musicala

giugadurAs: Albin Daniela, Albin Gion Giusep, Cathomas Alfred, Cathomas Giulian, Cathomen Veronica, Cavegn Meini, Cavegn Sandro, Cavegn Theo, Dos Santos Lucas, Muoth Ronja, Seiler Marc, Vincenz Luana, Zenklusen Michelle

costums, musica, requisits, tecnica: Brasser Claudio, Cathomen Anna Chiara, Cavegn David, Cavegn Fiona, Derungs Reto, Friberg Daniela, Friberg Marcus, Kressig-Bollhalder Sandra, Rupp Susanne, Seiler Adrian, Vincenz Lian

cavagl e vitturinAs: Frena; Cathomas Flurina, Cathomas Madleina, Cathomas Rahel, Cathomas Toni

Ustria dalla sera

organisaziun: Cathomas Angelina, Cathomen Cornelia, Cavegn Corina, Livers Madleina, Maissen Marina, Vincenz Gabriela

ustria: Albin Barbara, Arpagaus Milena, Balett Marianna, Balett Silvia, Balett Teresina, Cabalzar Martina, Caduff Bea, Cathomas Agnes, Cathomas Erna, Cathomas Maria, Cathomen Anita, Cathomen Berta, Cathomen Gabriela, Cathomen Isabella, Cavegn Erika, Cavegn Flurina, Fontana Selina, Friberg Judith, Friberg Monika, Henriques d. S. Fatima, Livers Corina, Müller Karin, Muoth Evelina, Muoth Gabi, Pohle Sandra, Schneider Erika, Seiler Rita, Simeon Lea, Spescha Gabriela, Strauss Martina, Tenner Sonja, Tuor Sybilla, Weber Zenklusen Barbara

Infrastructura

gidonters: Arpagaus Giusep, Arpagaus Raimund, Calzaferri Linus, Cathomas Gion Maurin, Cathomas Tadeus, Cathomen Aluis, Cavegn Reto, Maissen Patric, Muoth Ivan, Pfister Andreas, Santos Jorge, Tuor Zani, Vincenz Livio

emploiai da vischnaunca: Albrecht Patric, Balett Patric, Bundi Fabian, Deplazes Adrian, Friberg Maurus, Manetsch Fabio, Venzin Marcus

Regulaziun dil traffic

Cathomas Michael, Cavigelli Flurin, Defuns Maik, Hosang Laurin, Muoth Aron, Muoth Fadri, Pally Livio, Schmed David

Retrospectiva fotografica

Avertura

Curtgin Crest La Crusch



Vernissascha

Casa Fausta Capaul



Fotos vernissascha Tumpiv Media
Fotos avertura Larissa Cathomen

Inscenaziun teatral-musicala
Curtgin Casa pervenda



Fausta, ti has hosps!



Fotos Larissa Cathomen

Finiziun Casa Fausta Capaul



Las festivitats FAUSTA piuniera ein vargadas. Ed ussa? Circa 30 personas han discutau en divers luvratois co Breil duei sesviluppar vinavon. Pertuccont la cultura ein suandonts temas vegni discutai e proponi:

- casa da cultura ed occurrenzas multifunziunala
- presentar meglier vitg e vischnaunca:
«eventimentar» il vitg cun differentas guidas, turas, forza dall'aua, far paun, recepts vegls, semplamein in vitg che viva
- mantener e promover: lungatg romontsch, tradiziuns, uniuns, cultura indigena, autenticidad
- porscher occurrenzas regularas: concerts, teaters, exposiziuns, kino, prelecziuns
- cuors gratuits da romontsch



Fotos David Cavegn

Tradiziun religiusa

Cuorta historia dalla treis orglas dalla baselgia parochiala a Danis

Ella tiarza superiura han scolaras e scolaras dapi igl onn da scola 2019-20 da concepì ina lavur finala pli gronda, quei enteifer il niev rom individualisaziun. Duront 2 lecziuns per jamna sefatschentan ellas/els cun lur lavur d'approfondaziun (LDA) e duront 2 ulteriuras lecziuns cun dus roms d'accent (matematica, lungatgs). Il tema da lur LDA duess sche pusseivel haver in connex cun lur futur professional ni star en stretga relaziun cun lur hobbis e/ni interess particulars. Il scopo principal dalla LDA ei da preparar scolaras e scolaras da scriver lavurs da semeglient gener duront igl emprendissadi ni en scolas cuntinuontas.

En sia LDA ei Marco Nay da Danis sefatschentaus dallas orglas dalla baselgia parochiala da siu vitg nativ. Cheu suonda sia lavur.

1581 ei vegniu construì l'emprema caplutta a Danis, denton senza orgla. Muort memia pauc plaz ei quella caplutta lu vegnida remplazzada entras ina baselgia, la quala ei vegnida construìda 1656 – 1658 da paders caputshins dall'Italia.





La baselgia parochiala da Danis igl onn 1935.
Foto archiv parochial Breil

Era en la baselgia haveva ei all'entschatta aunc negina orgla perquei ch'in tal instrument custava memia bia. Fastitgs dad in'emprema pintga orgla (cun pedal ed in manual) sin l'empora nova dateschan digl onn 1845.

Quell'orgla ei vegnida restaurada 1879. Igl onn 1911 ei vegniu construì in'orgla pli gronda cun in pedal ed in manual, denton cun dapli fiffas e dapli registers (con biars sa negin). Quell'orgla ei restada tochen 1959 ella baselgia barocca da

Danis. Lu han ins spazzau la baselgia veglia e construì ina nova perquei ch'ei haveva puspei memia pauc plaz. Il medem temps han ins entschiet a planisar l'orgla nova. Cun la construcziun dall'orgla nova era ei previu da duvra per part elements dall'orgla ch'era vegnida construìda 1911. Ei exista plirs plans da differents architects:



Plans archiv parochial Breil

La finala ein ins sedecidius per ina versiun resch nova sco ella stat ussa ella baselgia da Danis. Quell'orgla cuntegn in pedal, dus manuals e 18 registers. Ella ha custau da gliez temps 53'930 francs ed ei vegnida construìda dalla firma Späth Orgelbau Rapperswil.

Dapi 1962 resuna l'orgla nova en la baselgia parochiala da Danis.




Foto kirchenonline.org

Da sgaras e tarlecs

Cura ch'il plevon intunescha il gloria ella messa da Gievgia sontga, tuccan ils zenns solemna-mein. Mo lu queschan els tochen l'intunaziun dil gloria ella messa da Sonda sontga. Ella liturgia vegn desistiu dall'orgla ed ils bransins vegnan remplazzai da tarlecs da lenn.

Tenor la cardientscha populara sgolan ils zenns per quei temps a Ruma. Schebein ils zenns semettan sin viadi per survegnir la benedicziun dil papa ni per prender penetienza ni per ina buna tschavera; sur da gliez sedispeta la cardientscha populara aunc oz.

La renunzia als zenns vegn magari declarada cun *gigina per las ureglias*. Semegliantamein ei la cuvretga da cruschs e maletgs duront quei temps da considerar sco *gigina per ils eglis*. La concentraziun duei vegnir fixada sin igl essen-zial dalla cardientscha.

Ils carstgauns dil temps medieval resentevan il silenzi dils zenns tut auter che nus ozildi. Era ei gie ils zenns che devan il ritmus al di e clamavan als survetschs divins. Aschia ein las sgaras ed ils tarlecs vegni inventai e mess en diever.

Quella tradiziun religiosa - che vegn per regola exequida dils affons - ei semantenida tochen sil di dad oz.



Foto P. Scheuermeier / Fototeca DRG

La fotografia da 1920 muossa il vegl caluster Caplazi cun gidonters pigns e gronds vid il sgarar e tarleccar. Las sgaras ed ils tarlecs sin la foto ein aunc oz en diever.

Il Gioder

Varga 450 onns ha il Gioder tuccau giu dil clutger da Breil. Aschia vegn il zenn grond vegl da Breil numnaus.

Dapi ils onns 1940 ei la pleiv catolica da Breil sefatschentada dall'engrondaziun e renovaziun dalla baselgia parochiala. Secapescha ch'era ils zenns ein stai ina part da quels studis. Grondas discussiuns e rumpatesta ha ei dau pertuccont il zenn grond, il Gioder. In zenn schi grond e da tala vegliadetgna era fetg rars el Grischun. Perquei ha igl Uffeci pil schurmetg da monuments buca vuliu schar remplazzar quel. Ins ha schau far pliras expertisas.

Signur Schiess da Berna vegn tier la suandonta conclusiun: «Die grosse Glocke [...] weist den Schlagton e' in hoher Lage auf. Die Harmonie der Teiltöne steht in gutem Verhältnis zum Schlagton. Der Ton der Glocke ist, im Bereich des Dorfes gehört, etwas hart und spröde, doch von brauchbarer Qualität. Die Glocke ist mit drei Schriftbändern, einer Madonna und einer originellen Theodulsfigur sehr schön geschmückt».

Ina secunda expertisa ha la firma H. Rüetschi, Aarau fatg. En quella studia stat scret denter auter: «Grosse Glocke, Durchmesser am untern Rand m 1.23, Hauptton e', Bronzegewicht ca. 1100 kg. Die Glocke wurde bereits zweimal gekehrt. Die breiten und tief ausgeprägten früheren Anschlagstellen des Klöppels an der Glockenwandung verraten, dass der Klöppel zufolge schlechter Führung «mähte». Der Klöppel ist von ungünstiger Form, sein Ballen von vierkantigem Querschnitt, der Vorschwung kurz und stumpf.

Tuts pertuccai ein la finala stai dil meini ch'il zenn grond sappi buca vegnir integraus el niev tuchiez da Breil. Suenter liungas contractivas ha il cantun cumprau il zenn e tschentau quel a Cuera el curtgin dil Museum Retic. Leu eis el staus varga vegn onns avon ch'el ei vegnius tschentaus el depot dil museum a Haldenstein.

En connex cun la renovaziun dalla baselgia parochiala e dil santeri igl onn 2020 ei vegniu discutau da puspei prender a Breil il Gioder. Oz ha el anflau in bi plaz el santeri a Breil.



Il Gioder en curtgin dil Mueum retic a Cuera

Entginas indicaziuns dil zenn

Cularia:

probabel Giesserhütte da Martin Kisling e Hans Folmer a Biberach en Tiaratudestga

Legaziun: bronz

Peisa: 1'100 kg

Diameter: 124 cm

Tun: e'

Maletgs: Maria e Sogn Gioder cul giavel che porta il zenn

Inscriziun (translaziun romontscha):

- Maria, mumma dalla grazia e mumma dalla misericordia, protegia nus digl adversari e retscheiva nus en noss'ura dalla mort.
- Maria, purschala dallas purschallas, urbescha per nus la remischun da cuolpa che calma tiu Fegl.
- Gloria a ti, Segner, che eis naschius dalla Purschala e regias en perpeten cun il Bab ed il Spért sogn.

Onn dil Segner 1513

Il zenn da Sogn Theodul (legenda)



Uestg Theodul cul giavel che porta il zenn

La legenda da Sogn Theodul (Gioder) ha siu origin el Valleis. Theodul ni Theodor ei staus igl emprem uestg da Martigny ed ei morts entuorn igl onn 400. Ils fastitgs dalla legenda tonschan lunsch anavos tochen egl onn 1491.

In di eis ei vegniu ad ureglia agl uestg Theodul ch'il papa seigi en grond prighel. Cheu vesa igl uestg co treis giavels saultan e fan legher en sia cuort. Theodul empermetta sia olma a quei giavel che porti el a Roma ed anavos e quei aunc avon ch'il tgiet conti.

En in hui ei Theodul arrivaus a Roma ed ha saviu alarmar il papa. Persuenter ha quel regalau agl uestg in grond e bi zenn. Cun tala carga ha il retuorn a casa denton cuzzau pli ditg. Els ein arrivai ella cuort digl uestg ch'il tgiet aveva gia cantau. En sia gretta fiera il giavel il zenn cun tala forza giun plaun che quel sfundra ella tiara. Cheu cloma igl uestg: «Zenn, zenn tucca!» - ed il zenn ei sesalzaus ord la tiara ed ha entschiet a tuccar.

Theodul ha viviu el quart tschentaner a Martigny. Il num Theodul ei semidaus en Theodor e Joder e per romontsch en Gioder.

Fotos Terra Grischuna

600 onns Ligia Grischa

Pertuccont la cultura stat igl onn 2024 sut l'enzena dil giubileum da 600 onns Ligia Grischa. Las festivitats da giubileum *sut igl ischi 2024* han liug principalmein a Trun, denton era en auters loghens dil territori dalla Ligia Grischa.

La Ligia Grischa ei seconstituida sco reacziun sils embrugls, las turbulenzas e lutgas denter las famiglias da noblezia Belmont, Sax-Mesauc, Razén, Vaz, Werdenberg, la claustra da Mutér ed igl uestg da Cuera. La ligia haveva la finamira da garantir la pasch ella tiara ed oravontut procurar per in passadi segir sur ils pass. Igl onn 1424 vegnan las decisiuns ch'eran vegnidas francadas igl onn 1395 denter ils nobels a Glion renovadas e prolungidas per "temps perpeten". Tochen 1778 ei la ligia adina puspei vegnida renovada. Igl onn 1798 eis ella svanida sco part dalla Republica dallas Treis Ligias.


Il pli ault post dalla Ligia era quel dil cauligia, numnaus il landrehter. Quel vegneva mintgamai eligius per dus onns. Ils uoppens dils 72 landrehters ein da veser ella sala dils landrehters ella Cuort Ligia Grischa a Trun.

Ils Landrehters da Breil ein stai:

1585/86 Buldet Manisch/Dominicus
1588/89 Buldet Menisch
1654/55 Turre/Latour, Duitg/Ludwig
1657/58 Turre/Latour, Duitg/Ludwig
1660/61 Turre/Latour, Duitg/Ludwig
1675/76 Turre/Latour, Duitg/Ludwig
1693/94 Turre/Latour, Caspar de
1699/00 Latour, Adalbert Ludwig de
1702/03 Latour, Adalbert Ludwig de
1705/06 Latour, Adalbert Ludwig de
1711/12 Latour, Adalbert Ludwig de
1756/57 Latour, Duitg/Ludwig de
1768/69 Latour, Duitg/Ludwig de



Adalbert Ludwig de Latour, 1657-1742
mistral, landrehter, landeshauptmann
Foto Michael Friberg



Territori dalla Ligia Grischa / Carta Cudisch La Ligia Grischa, 1924

Infos dallas festivitats: www.ischi2024.ch